

重修兩淮鹽法志

兩淮鹽法志卷八十

督銷門

皖岸督銷

下

同治五年七月署運司程桓生詳奉札行皖鹽統歸大通招商總局議定循環給運卽將揚州皖鹽招商分局裁撤歸併署司衙門督飭總局辦理等因並據皖鹽分局送到各岸卷宗護照等件卽經發交總局查收並行瓜棧會議章程詳復核辦在案茲據棧局會稟稱皖岸開江各事仿照楚西章程會議七條等情到司據此署司逐條覆核所有第一條請將皖鹽護照自丙寅春綱爲

始由司申請核發轉給填用應如所議辦理並咨大通  
總局卽將乙丑秋綱並丙寅春綱各販的名籍貫開冊  
送候發局備查第二三條所議護照船單及各卡文件  
統由該局隨時核發並將開江名引各數按旬改由該  
局分別開報此係分局向辦之件現旣裁撤自應統歸  
該局查照楚西章程分別妥辦以歸一律第四條皖鹽  
每票完繳報效局用兩款向由大通總局核收揚鎮軍  
營鹽釐及沙漫洲鹽釐同賞號銀兩向繳該局按引核  
給聯票應仍照舊辦理分局旣裁毋庸加戳第五條書  
識改爲清書兵役改爲局差以及紙張油燭等項均准

照所議數目按月隨同楚西局用稟請支發所有添製  
卷箱什物等項亦准核實請支第六條新河查船委員  
本有查驗楚鹽薪水此次兼查皖鹽應准給清書二名  
及紙張油燭費每月支錢十八千文不得另支船價以  
節糜費至按船烙用火印既臻妥善卽令該局循照楚  
西章程辦理第七條左照擬按旬申送每次給發盤川  
錢十千文應准照辦除稟批示並移大通局查照外理  
合照錄清摺詳祈核示 一皖岸開江護照向由大通  
督銷總局申請飭發隨時填註花名引數將照根留存  
督銷局其中左二照給商齋揚呈投分局請單赴棧買

鹽繳價過掣後請照開江分局截留左照而以中照給商護運此皖局舊章也伏查皖鹽招商局稟議續認皖鹽章程奉批楚西護票見皆由淮南總局給發皖岸續認之鹽自宜仿辦以昭畫一等因謹當遵辦至見定循環給運仍由大通總局給文請運查乙丑秋綱並存記丙寅春綱卷冊祇有花名引數的名而無籍貫應請咨明大通總局將該商等籍貫移送憲臺衙門飭發下局備查 一皖鹽過掣後駁上江船由新河口委員逐艙查驗填明艙口包數交商同買單呈繳分局請換護照分局將護照呈請蓋印並請填發艙單似與楚西章程

兩歧擬請以後艚單改由總局填給以歸一律至於護照隨時呈請蓋印所有開江掣驗各卡文件均照楚西章程逐案填發 一皖岸引票向由分局將開江名引各數按旬申報大通總局並按月摺報督鹽憲查考茲擬循照楚西章程所有開江名引各數仍按旬申送大通總局並開摺申由憲臺轉報督鹽憲查考 一皖鹽以一百二十引爲一票每票繳報效軍需湘平銀一百二十八兩又局用每引一錢五分揚鎮軍營鹽釐每引一兩二錢沙漫洲鹽釐每引三錢二分又安梅兩書院經費每引四分八釐其報效局用向繳大通總局核收

揚鎮軍營沙漫洲鹽釐賞號等三款向繳總局轉解今分局奉裁所有應繳各項銀兩應請仍照舊章辦理再查皖商呈繳前項釐銀向由總局填給聯票該商於開江時赴皖岸分局呈驗加戳此後開江各事均歸總局經理毋庸再加戳記於開江文件併給護運以免隱混一皖岸分局每月支領薪水書役飯食紙張油燭等項銀二百十餘兩按月赴大通總局支給由總局併報核銷今淮南總局接管開江一切公事文件較繁分局原設書識三名應請仍留總局作爲清書又親兵差役七名減爲局差二名每月飯食以及紙張油燭等項可

否循照楚西成案按月於經費項下請領此外尙須添置卷箱什物等件業已先行墊辦容俟請領局用時一併開單支領 一新河口皖鹽查驗委員係楚鹽查船委員兼辦給予薪水未免重複茲擬改給查船巡船一隻清書一名並紙張油燭每月支錢二十三千文由總局併領轉給以資辦公惟查楚西鹽引圓載後於平水處烙用火印以杜沿途增減之弊立法極善見在皖鹽船隻應仿照楚西辦法由局領發火印於驗明填單後在於船旁平水處蓋烙以便稽查而杜弊混 一皖鹽護照之根應存局備查中照截角後給商護運左照按



旬申送大通總局核對其齎送左照盤川擬每次給錢  
十千文大通程途較近似須按旬齎送以期迅速經署  
鹽政李鴻章批如詳辦理

同治七年二月皖鹽招商局知府李興銳稟皖岸銷路以  
安慶爲大宗甯池太次之和州又次之無巢等岸雖有  
帶銷之名究無什一之效緣邊界接壤江甯浙江淮北  
甯岸侵灌和太受其害浙私早道入境甯池太受其害  
北私自徵收稅釐官私無所辨別流毒及於完膚和含  
桐潛受其害至於楚湘西鹽船有灑賣礮船民船有夾  
帶則濱江鋪店上下支港羣受其害卑府昨又聞鄂局

有武穴分銷之舉西局有湖口分銷之說武穴之至宿  
太潛望湖口之至東建安慶則較大通近而且順水道  
旱道大江內湖處處可通卽云鄂西岸價較皖引百斤  
貴四錢而皖引上駛之船另有鹽河華陽鎮兩卡釐金  
錢八百文加以數百里之水腳盤費絜長較短是侵皖  
之弊不待智者而決也皖局若添設分銷與之並峙則  
耗費而無益若設卡堵緝則毘連之區道路紛歧亦必  
無從奏效下游旣如此上游又如彼皖岸全局何堪設  
想經鹽政曾國藩批皖岸地處中路所陳各路私鹽四  
面受害自係實情惟邊界鄰私充斥總由兩岸售價軒

輕何岸價輕卽侵重價之岸勢有必然該岸所患以浙  
私北私及下游食岸之私爲甚緣私價均照皖價減輕  
之故其上游楚西兩岸官鹽售價重於皖岸向來祇患  
皖鹽之上侵不患楚鹽西鹽之倒灌是以鹽河華陽兩  
卡鹽釐曾據魏道稟請免繳當經批駁所以保楚西藩  
籬也見在江西之湖口雖據丁鎮稟請設立分局尙須  
從長計議並未定案其湖北之武穴係仿西岸吳城之  
例設一分局以便蘄黃各水販就近買運實因鄂鹽滯  
銷太甚不能不設法疏通已據程道報明於本月二十  
日開局不便中止細核鄂皖價值鄂價本較皖價每百

斤向重五錢今鄂價新減三錢皖價新減二錢是鄂價較皖祇重四錢矣而鹽河華陽兩卡皖鹽每百斤共計應抽釐錢八百文再自大通運赴上游水腳以之抵四錢銀數則皖價重於鄂價該守深恐鄂鹽有損皖引所慮甚是本部堂酌核應將鹽河華陽兩卡之釐減去一半每卡每百斤祇准抽釐二百文則兩岸鹽價約計相等可免彼此侵灌於鄂皖兩有裨益

同治八年八月皖岸督銷局道員袁保慶稟准程道面稱由瓜棧賣北鹽五十票除去一切費用約贏餘錢一萬二千串有零按一百五十票計之共十四萬四千包約

下  
卷  
六  
贏餘錢三萬六千串有零按此數細算每鹽一包約贏  
餘二百五十文有零此贏餘之欸卽在北商所繳牌價  
之內茲請減牌價卽是減贏餘然每包雖減去二百文  
一減售價必能多銷卽祇多銷五十票卽可得釐金報  
效局費等銀三萬六千一百八十二兩七錢卽多於贏  
餘三萬六千串之數且每包減去二百文尙留贏餘錢  
五十文有零統一百五十票計之尙可贏餘七千二百  
串有零是以雖減北商牌價於公欸並無虧損又查安  
慶所屬之鹽河華陽鎮兩釐卡抽收鹽釐經兩次裁減  
後見在仍按每百斤抽收釐錢一百文查此項釐錢爲

數雖屬無多而水販本係小本營生多出一錢則少獲一錢之利且汴流逆行過卡必須停泊守候一遇風色不順每至遲延時日多耗盤費運至宿太望邊境每百斤售價較岸價加至七八百文以致楚西之鹽倒灌入境見在安慶設局分銷所有上游水販正宜格外體恤以廣招徠而疏銷路可否將此項鹽釐全行裁去經鹽政馬新貽批查鹽務以保價爲主減價定難持久道光末年行票楚西岸價減至每斤售錢二三十文遂至一蹶不振曾爵閣部堂有鑒前事之失故所定新章專重整輪板價今北鹽色潔粒大不特易侵皖岸且易上侵

楚西從前李署部堂任內酌定江運章程本議每百斤售銀四兩北鹽售價必使重於南鹽者具有深意節經核減每百斤售銀二兩八錢與南鹽價值相埒已屬格外從輕若再每包減銀四錢五分每引卽減三兩六錢之多與南鹽輕重懸殊皖岸全局恐致掣動至瓜棧牌價亦不便輕議更張蓋一岸請減難保他岸不從而效尤所請礙難准行另稟請全裁鹽河華陽兩卡鹽釐係爲減輕南鹽販本保固皖岸藩籬起見仰候咨請安撫部院酌核飭遵

謹按安慶鹽河華陽鎮兩卡後經安徽巡撫咨復裁

撤

同治十二年十月皖岸督銷局道員劉鍾靈稟查蕪湖一局分銷太平甯國兩屬近因浙鹽減價私販成本過輕以致侵灌漸廣岸銷終無起色職道前以皖南腹地甯涇旌太各縣廣輪數百里並無鹽行子店欲禁私販之不來必先使官鹽之不缺屢屬各縣令勸諭紳富店戶籌運官鹽以爲嚴緝私鹽張本至今未有應者當與蕪湖局員方倅克猷擬議招商前赴淮引邊境開設總店姑與私鹽犄角逐漸推廣以期得尺得寸之效嗣據方倅稟稱岸廢旣久羣情畏阻請於宣城縣地方官開總



店由蕪湖專放尾輪票鹽前往銷售照和州緝私卡兼辦分銷章程取行用七分總店中新工雜費取給於此職道又以總店銷鹽究竟有無把握甯國郡城西北面毘接太屬私鹽較少係灣沚鹽行銷鹽之地總店既開能否銷鹽於郡城西南不致攘該行向有之銷數批飭詳議茲據覆稱官店坐控邊界會同緝私各員內外梭緝於郡南地方逐漸推廣月計銷鹽似不減於和卡請暫行試辦等情職道查浙私價賤與官鹽懸殊大半徽甯之交萬山叢雜路路可通坐視侵占尸素云何力圖疏通萬全無策所擬官開宣城總店既據方倅一再議

請自應卽行創設以爲恢復引地之餽羊使緝私稍有據依亦使民食不至藉口經鹽政李宗義批准

光緒十四年十月皖岸督銷局道員張銘堅申南北兩岸暨宣甯水旱緝私各卡員弁均有總巡就近統率歷年以來稽查有資尙稱得力惟查和州當塗蕪湖以及滁來全等處水陸緝私各卡四處分布地面遼闊距通較遠誠有鞭長莫及之勢若無總巡就近管率鉗制稽查難保無短少勇數剋扣口糧賄縱偷情滋擾地方等弊况緝與疏事本相因銷數之暢滯全視緝私之勤惰以爲衡巡緝不勤則引銷必滯誠恐負虛名而無實效雖

相因反不能相濟且不惟不能相濟尤恐滋生流弊勢所必至籌思再四不得不設法整頓欲求整頓不得不杜防流弊欲防流弊不得不責成附近各分局委員總巡緝務督率稽查使之疏緝兼施責無可諉誠爲一舉兩得之便因將和州水陸緝私卡責由和州分局委員張守就近兼轄當蕪沿江緝私責由蕪湖分局委員歐陽運判就近兼轄滁來全並香泉夾山關及緝卡責由全椒官運分局委員王令就近兼轄並各加給緝卡總巡鈴記一顆以昭信守而專責成庶幾督率與稽查兩有所裨且遇緝務緊要事宜責有專歸不致彼諉此推

展轉久待窒礙滋虞

光緒十四年十二月皖岸督銷局道員張銘堅稟竊惟疏銷之要首重緝私皖岸自頻年整頓以來於毘連鄰境邊隘要區布置較爲周密是以雖值歲祲銷數尙無減色惟腹地通貫長江上下六百餘里爲各岸鹽船同出之途所帶私鹽沿途灑賣爲害實深雖經設礮船分段駐劄而船少路遙不敷分布且各有汎地勢難遠巡見查鹽船夾帶較前更多而楚西兩局於到岸時查船查艙講求日益精密是以各岸船私必在皖境售盡而後已以完善稠密之區受此侵灌揆度時勢若不早爲設

法必致大礙岸銷況部中於鹽課盈絀考核綦嚴職道承乏督銷尤不敢不竭力籌畫以期無誤要公再四思維擬添設礮船五號以爲專巡長江之用計下自采石以下上至華陽以上鎮日來往梭巡遇有上駛鹽船卽令或前或後隨行監護務使灑賣無地可施將皖岸之防範愈嚴則楚西到岸之稽查亦愈爲得勁庶夾帶可期漸清而岸銷可期永保所有新設礮船勇數擬照向額每船減少二名月需弁勇薪糧三十九兩一錢以五號計之共月支薪糧一百九十五兩五錢擬請列入局用開報造船工價擬於緝費項下動支經鹽政曾國荃

批允

光緒十六年正月皖岸督銷局道員張銘堅稟上駛鹽船  
往往夾帶私鹽沿江灑賣影射官銷皖岸首當其衝上  
年曾經職道試添舢板五號專在長江押送鹽艘過境  
勿令停留灑賣似於銷數尙有裨益但自采石至華陽  
鎮上下六百餘里長途寫遠各幫之船或三五同行或  
連檣接駛該舢板等跟蹤追緝游弋往來尙虞不能首  
尾兼顧擬請再添舢板五號飭令分押隨行轆轤轉送  
銜接一氣更昭周密但目前緝私經費支絀查有隨局  
差遣委員薪水銀有在緝費項下開支者共計八十餘

兩擬懇歸局用項下列冊開支卽以此項騰出之欸添作舳板弁勇薪糧如此一轉移間緝私可得實效銷數不致漸衰而常年經費亦有歸宿之處卽或不敷仍由職局籌給支墊將來某欸項下進有盈餘卽請撥融銷再釘造礮船必須工堅料實擬請札飭燕子磯船廠趕造新舳板五號並請飭令轉飭工匠勿稍偷減工料務宜船身堅厚涉水利捷以便追緝私船無虞風濤險惡所有造船經費卽由該船廠核實開單移會職局在於緝費項下支銷照數開報經鹽政曾國荃批允

光緒十六年三月鹽政曾國荃示諭照得皖岸沿江引地

上游至華陽鎮起下游至和尚港止爲各岸鹽船及各  
項船隻必經之路往往停泊灑賣影射官銷雖准設有  
礮船十號押送過境但江面遼遞計有六百餘里之遙  
每逢大幫鹽船乘風上駛及至中途可以售私之處故  
意分起開行而押送之礮船首尾不能兼顧仍難免有  
灑賣情事經皖岸督銷局張道呈請長江提督軍門李  
札飭華陽安慶提中蕪湖裕溪大通各營轉飭所屬各  
汛遇有鹽船及民船停泊灑賣私鹽設皖局無船在彼  
巡緝卽由各礮船一體相機妥爲查拏以肅鹺綱其在  
長江行駛之鹽船及各項船隻仍不得呼令落篷致滋



羈阻

光緒十六年十月皖岸督銷局道員張銘堅稟陳皖岸大概情形竊查咸豐三年皖省被匪僭踞長江運道梗塞官鹽無商經理鄰私充斥莫可稽考幸於咸豐十一年冬間克復安徽省之後知府劉履祥奉札來通籌銷官鹽以濟民食嗣因長江一律肅清卽在大通對面之荷葉洲設立總局遵照前鹽政曾文正核定新章一律招商認運原定引數六百票因商多票少不能徧給衆商復經道員魏承越稟改掣籤辦運奉札卽就此次認定六百票原商轆轤轉運同治八年四月前鹽政馬端敏札

飭大通鹽局取名招商見已認定循環轉運改爲皖岸督銷局以符名實至光緒八年奉加新引案內皖岸加引一百四十八票內四十八票加入南鹽環運一百票加入北鹽環運統計南北引額七百四十八票舊時行鹽引地兵燹後戶口彫殘情形迥異開局之始僅銷三四百票上下迭經承辦各員開拓銷路嚴辦緝務次第舉行銷數漸能暢旺然有岸廢日久片引不行無商認運者滁來兩岸先經稟請改辦官運嗣因全椒一縣毘連甚近向係南鹽引地岸引久懸亦稟改行北鹽統歸官運辦理查皖岸地面廣闊逼近鄰界之處頭頭是道

故卡防雖已林立而私鹽來源極廣鄰岸之私或因價賤而易侵或因大幫而難堵如潛太宿望旱路則有淮北之私水路則有長江之私宣甯池太等處則有食岸侵銷浙鹽旁灌儻再能按照分局圖說添卡設防堵絕各處要隘銷數當不止此無如經費難籌目前無力舉辦擬俟籌有款項當卽察酌情形擇要佈置非敢任其漏卮也再咸豐八九年間粵匪盤踞皖界有總兵李德麟統帶紅單船兵勇鎮守大通一帶其時徽甯池太各屬百姓避亂至荷葉洲始得保全惟紅單船口糧缺乏由李德麟自行設卡抽收貨釐鹽釐以作餉需於咸豐

十一年間安慶省恢復始委劉履祥赴荷葉洲辦理水  
釐局務並設立官鹽局籌辦官鹽當時九洑洲尙有賊  
壘係用長江輪船拖帶上駛直抵大通由官鹽局發售  
安徽江西湖南湖北各省接濟民食其應完鹽釐每包  
五百文同治元二兩年均由大通水釐局核收報解於  
同治二年冬月間奉札開辦招商總局遵照新定章程  
招商認運自同治三年正月售鹽起所有應繳鹽釐均  
歸招商總局核收報解嗣於同治八年改爲督銷局今  
仍其制

兩淮鹽法志卷八十

兩淮鹽法志卷八十一

督銷門

江甯食岸

江甯淪陷十年岸廢久矣自同治二年金陵合圍上游江面肅清皖西鄂湘同時整理鹺綱而江甯食岸以次收復至三年始招商認岸江浦六合等邑常不足額上江往往溢銷則配以儀徵滯岸後又以儀徵配江甘食岸蓋以暢配滯以盈補絀亦一時調劑之方云志江甯食岸

同治二年十二月鹽政曾國藩札淮南引鹽楚西皖三岸

業經刊發新章江甘等五岸並已批飭該司妥議具詳  
此外江甯府屬食岸內除上元江甯句容三縣未經克  
復外其六合江浦溧水高淳四縣若招大商認運該四  
縣離賊較近深恐無商應召且絕小販生計亦難保不  
流爲私梟又通泰附場各州縣雖無額引亦應設法籌  
銷以冀多售一引之鹽卽多得一引之課應由該司仍  
發稅鹽護照一引一張悉聽小販運售惟亦須酌定引  
數以示限制每年先定三萬引每引斤兩亦照楚西皖  
之例正鹽六百斤外加滷耗六十斤包索二十八斤分  
裝八包每包連索八十六斤應收正雜課暨鹽價在內

約計銀五兩五錢二分與綱岸相同其鎮揚等處鹽釐按六百斤照章折算每引由口岸運售者應完若干由東路運售者應完若干約計成本售價各若干並由該署司確切查明開具清摺申送又揚州府屬之儀徵一縣前有仿照江甘認岸免釐運銷易滋影射出江之弊應卽停止統歸三萬引內照稅鹽章程一律辦理至稅鹽護照前係每引九百斤涵耗包索亦與此次不同應由該司另擬新照之式專丁送核後再行刊發註明不准侵銷楚西皖三岸及江甘等五岸越境以私論字樣所有楚西皖三岸前雖由本部堂另給護照該司衙門



同治二年十二月署運使忠廉詳查淮南自改行稅鹽係  
仍將一引一張之稅鹽護照一併掣給現既分定新章  
刊頒三聯護照嗣後發三聯照者毋庸由司再給稅鹽  
護照以歸簡易

同治二年十二月署運使忠廉詳查淮南自改行稅鹽係  
由總局刊印局照呈送本司衙門蓋印存局於商販買  
鹽過壩後填給護運計鹽十二包爲一引用照一張今  
奉核定章程楚西皖三岸已頒發三聯護照飭將稅鹽  
護照毋庸再給應卽遵辦惟查各棧商請引重鹽係由  
總局發給執照赴場捆重護運到壩卽行繳銷其商販  
買鹽後由壩出江向係專用本司衙門蓋印發局之稅

鹽局照今將稅鹽局照停止則出江之後有三聯護照  
爲憑而自壩運出江口零星駁送無可稽考署司擬另  
刊局票仍由本司衙門蓋印存局於楚西皖三省販鹽  
過壩後按照駁船所裝引數填給每船一張護運至江  
口俟江船受載後由該江口查驗卡員收回按旬彙繳  
總局以免淆混而便稽查至江甯府屬之六合江浦溧  
水高淳句容上元江甯七縣向爲蘇省引地見已陸續  
收復誠如憲札離賊較近誠恐無商應招且絕小販生  
計亦難保不流爲私梟應請另刊蘇字號鹽照悉聽小  
販買鹽運赴七縣銷售惟蘇字號引地皆須出江未便

免釐輕本致礙皖局所有應完揚鎮軍營釐銀每引一兩二錢沙漫洲糧臺釐銀每引三錢二分都營賞號每引四分八釐無論口岸東路及白塔河運行出江者均一律照完以杜趨避其儀徵食鹽見奉停止查儀徵向爲南鹽改捆匯總之地故無額引今南鹽既不赴儀改捆卽與尋常引地無異未便令其私食且見在儀河淤塞總須繞由外江方能到儀應與江甯府屬之七縣一律辦理凡商販請運者不准下場捆重皆令赴公棧買鹽赴鹽釐局完釐聽其出江銷售鹽照上註明不准侵銷楚西皖三岸及江甘等岸違者以私論字樣至附近

場竈之通州如皋泰州興化東臺鹽城阜甯七州縣內如東臺鹽城阜甯皆與鹽場同城各鄉鎮亦均逼近場竈定例貧難小民肩挑背負之鹽在三十斤以內者許民自便無業老幼男婦埽拾腳鹽藉資糊口故民間食鹽每斤僅值二三文勢難收課惟泰州興化通州如皋四州縣所治距場竈或百里或數十里察看地勢似可行銷應由總局另刊附場各州縣食票由司蓋印發局備用亦按六百斤成引每包斤重悉照稅鹽每引給票一張填明行銷某州縣不准出江及越境侵銷違者以私論字樣其正雜課銀應照稅鹽科則一律徵收此項

食鹽行銷腹裏州縣不准出江售價亦賤應請免其完釐泰州爲設立鹽棧之所應由棧就近售賣由局給票其通州如皋二處向屬通分司應飭通屬棧商認辦興化一處向屬泰分司應飭泰屬棧商認辦赴總局完課繳捐後給予食鹽票赴場捆重就近運往分銷緣該三州縣距鹽場皆近若令赴泰棧買鹽舍近求遠徒糜水腳惟出場之後均應認真掣驗以免夾帶諸弊應飭通泰兩分司就近委員辦理俾專責成以上所擬辦運江甯府屬七縣及揚州府屬儀徵縣之出江稅鹽泰州興化通州如皋四州縣之附場食鹽其所收稅課均在憲

臺飭辦三萬引之內惟創始之初未能分別定額容俟  
試行有效再行議詳經鹽政曾國藩批據擬蘇字號照  
式與浙鹽之蘇松蘇字淆混查今之江甯古稱昇州騎  
縫處應改用昇字號至楚西皖三岸新鹽自泰州駁至  
江口應由司另刊駁票蓋用司印發局填用且須多印  
空白每次至少必須千張預交局中以免臨時守候至  
東臺鹽城阜甯三縣據請免課核與咸豐七年奏案無  
分食鹽岸鹽一律收稅不符礙難照准其通州如皋泰  
州興化四州縣港汊紛歧頭頭是道隨時皆可出江一  
經免釐籤商認辦適啟影射之弊所議亦未允協以上

七州縣均係附場向無定額應聽小販或在泰州總棧或在通屬分棧就近買運稅鹽其應完課釐卽與江甯各屬及儀徵一岸一律辦理其刊護票不必另用附場食鹽護票以免畸輕畸重之弊再稅鹽由口岸及白塔河出江售銷者係達儀徵及江甯七屬應完鎮揚鹽釐每引一兩二錢沙漫洲鹽釐每引三錢二分都營賞號每引四分八釐准其照辦其由東路出江銷售者係銷沿江沙洲一帶應完鹽釐向與口岸稍有區別是以前札內飭將釐數分別開呈茲據詳請無分口岸白塔河東路一律抽收是否東路之釐尙可酌增有無窒礙未

據明晰聲敘仰再另議詳奪至沿江沙洲之鹽必須出江與附場食鹽又不相同護照內亦應註明已於照式內加註矣

互見引式

同治三年三月署運使忠廉詳據總局委員武丞等詳稱查東路引鹽分銷通如沿江沙洲食戶向未完釐同治二年七月奉飭東路抽釐濟餉始行起捐每包收釐錢一百文按十二包之引每引抽收釐錢一千二百文又奉札飭核議江甯府屬七縣並裏下河七州縣各食鹽分別釐數擬呈票式等因卑職等當以裏下河七州縣地居腹裏附近場竈向無額引而東路引鹽雖行銷沿



江沙洲實與出江無異若略示區別內則侵裏下河七  
屬外則侵江甯府七屬是以將東路引鹽議令與江甯  
府屬七縣及儀徵一縣一律完釐查刊本新章改爲八  
包成引今擬仍照上年核定每包抽收釐錢一百文之  
數議以每引抽收釐錢八百文惟東路引鹽與江甯府  
屬七縣及儀徵一縣同用昇字號之票而釐數輕重懸  
殊仍恐滋影射之弊必須與以限制擬請每年以八千  
引爲率仍由通屬各商稟請撥運如銷足八千引之後  
再有撥運卽照昇字號章程完釐並將所發昇字號東  
路票上加戳註明祇准在通如一帶沿江沙洲行銷不

准駛過口岸鎮上侵江甯府屬及儀徵引地違者以私  
論字樣庶較周密等情署司伏查東路鹽釐前據該局  
員等議覆江甯府屬七州縣食鹽詳請無分口岸白塔  
河東路出江者一律抽釐茲據詳稱仍請照上年所定  
每包抽釐一百文等情署司悉心酌核從前在口岸設  
局抽釐凡運儀徵銷售者每引抽銀二兩七錢五分運  
赴小河銷售者每引抽錢六百文已有避重就輕之弊  
經郭前升司核議無分儀徵小河一律抽收釐銀二兩  
二錢八分二釐五毫嗣准糧臺咨東路出江稅鹽由石  
莊行掣驗後每包抽釐錢一百文各在案見奉批飭通

州如皋泰州興化等州縣港汊紛歧隨處皆可出江其應完釐課卽與江甯府屬一律辦理以免畸重畸輕之弊等因仰見洞察奸商巧於避就以杜弊端之至意若據該總局所議東路出江引鹽照例每包抽釐一百文於奉發昇字號票內加蓋紅戳註明祇准在通如一帶沿江沙洲行銷字樣該商販等惟利是趨一經出江沙洲地方遼闊隱射之弊稽察難周且見在附場各州縣食鹽旣飭赴棧買鹽一律抽收釐課是東路各沙洲行鹽必須出江若非一律抽收稍有區別卽難免避重就輕之弊應請仍照原議一律抽收以杜弊混經鹽政曾

國藩批准照辦

同治三年四月鹽政曾國藩批運司忠廉詳既據核定高涇溧水兩縣每月應派銷鹽五百五十五引准卽如詳辦理嗣後昇字號護票無運赴高涇溧水字樣並未加蓋局印者一概不准過大勝關卡越境均以私論

同治三年七月署運使忠廉奉督憲批本署司詳上江二縣引額議請仍照昇字號原定章程八岸通銷不必過爲區別緣由奉批查江甯食鹽科則較輕易侵皖界前因皖岸被食鹽侵占滯銷異常始經本部堂飭將高溧兩縣引數核定以示限制旋據張道具稟未註高溧字

樣加蓋局印之票仍復源源而來令其折回該卡又係  
江甯縣轄境不能概止行銷是以復令核定上江引數  
無非爲力保藩籬起見茲據該署司詳稱楚西並不禁  
皖岸之多運則皖岸不必限昇字號以少運等語查楚  
岸於武穴設卡西岸於湖口設卡其武穴湖口以上並  
無皖岸引地故可不禁皖鹽之多運今皖岸於大勝關  
設卡大勝關以上尙有江甯高淳溧水三縣係食鹽引  
地若不核定引數勢必散漫無稽皖鹽盡被占銷矣司  
詳又稱皖鹽侵灌楚西尤較昇字號之侵皖爲易等語  
查皖岸商鹽祇准運至大通爲止其不能侵銷楚西固

無論已至水販在大通買鹽每引需價十八兩運至大通以上尙須完安慶及華陽鎮之釐卽使上侵楚西其本已較緩釐之商鹽加重幾及一倍故楚西兩岸見獲之私係下游帶往無票之私多起並未報獲皖引之私一起非同江甯食鹽之侵皖岸疊據大通局金柱關大勝關具報噴有煩言也司詳又稱令昇字號逐縣定數恐無裨於皖岸先有損於釐課等語查食鹽與皖鹽課則相同釐則大相逕庭多銷一引食鹽僅得鎮揚等處釐銀一兩五錢六分八釐被占一引皖鹽少收報效釐金等項共計八兩六錢一分八釐孰利孰害此不待智

者而知矣。司詳又稱浙引所不能到之地，昇字號所能到之地，等語。查下游之口岸及東路對江，皆係浙引地。界前據該司詳請下游食鹽暫緩派定引數，當經批明下游所銷者，卽不分成數，亦無不可在案。若運赴大勝關以上，相距浙界甚遠，何能以此藉口？總之淮南目前情形，全賴楚西皖三岸銷數暢旺，大局方有起色。其江甯食岸將來必須籤商專認，此時金陵未復，姑聽小販運售以資生計，然不限定引數，盡破皖岸藩籬，所關匪細。此詳實屬偏重一端，礙難准行。所有上江兩縣尙未克復，應照高溧核定引數再減八折，每月祇准請運四

百四十四引其加註給文及應完大勝關之釐悉照高  
溧之例辦理上元之引並不准運至大勝關以上以清  
引界而杜影射等因奉經札飭淮南總局遵照應自七  
月初一日起凡請運上江兩縣食鹽者卽於昇字號票  
內分別註明蓋總局鈐記以示區別呈覆鹽政查核

同治四年五月淮揚水師新右營張元龍稟前派副將銜  
儘先參將茅子莊帶船往赴口岸協同委員緝私當查  
口岸地方爲淮鹽出江總匯之區楚西皖三岸均奉憲  
發護照由招商局每票按船填給護運尙易查核惟昇  
字號專運江甯七屬及儀徵一縣其在口岸以內既有



護照又有釐票自係官鹽而出江以後私售漏釐此爲  
官中之私必須妥議章程以杜其弊其沿江上下口門  
極多私鹽尤易潛出惟有協同該委共議章程竭力巡  
緝總期私鹽斂迹不負委任經鹽政曾國藩批江甯七  
屬食鹽流弊極大見在上元江甯六合三岸已有商專  
認其餘江浦高淳溧水句容及儀徵一岸或由司籌辦  
官運或招商一律認辦仰候札飭淮運司妥速議詳南  
鹽移棧之後卽應將小票食鹽停止以保綱岸藩籬

同治四年六月江南鹽巡道龐際雲詳奉督憲批上元縣  
詳岸商何公遠請在湖熟鎮添設子店等緣由奉批食

岸開設子店須查離城若干里四至鄰縣邊界若干里以杜侵銷皖岸之弊查湖熟地方據上元縣申稱離省城六十里東至句容縣四十五里南至溧水縣六十里西至當塗縣一百二十里尙隔江甯溧水此店與皖岸似不相涉且傳據該商何公遠面稟四至中惟句容稍近而句岸鹽賤侵銷江甯此店正以自固藩籬等語亦屬實在情形經鹽政曾國藩批准

同治四年十二月運司丁日昌等詳據淮南總局委員詳稱查甯屬各岸及儀徵一縣食鹽疊奉爵閣督鹽憲會札飭招商專認等因業據商人何公遠等先後稟請專

認在案伏查從前散商請運昇字號稅鹽出江之後散漫無稽影射盜賣弊端百出遂致江船夾帶日甚一日幾於無船不有蓋因通如一帶港汊分歧隨處可以透私緝不勝緝該販等每有運鹽出江私自盜賣復至各港潛買私鹽重複漁利遇有兵役稽查卽以照票呈驗陽假運鹽之名陰遂透私之計不但皖岸被其侵銷江船夾帶一多卽楚西各岸亦暗受其害況零星小販資本無多有利則來無利則往是其長技岸銷暢旺爭先恐後時有擁擠之患一經滯銷則相率觀望裹足不前引地旋爲鄰私侵占其害不可枚舉卑職等通盤悉心

籌計散商運售流弊滋多不若專商認運督銷較有把握擬請仍照前定章程察看辦理俟一二月後該商等如果認運不力再行招商散運卑職等一面嚴催各認商趕運場鹽源源接濟毋致脫誤並飭該商等設法疏銷整頓岸務以期日有起色規復舊額而固藩籬經署鹽政李鴻章批既據縷陳小販散運弊害甚多准如所議仍歸各認商專運惟查各岸均有欠運之數皆由商本不足不能多運鹽斤儲岸待售以致岸銷時虞缺乏商鹽不繼私鹽卽乘閒而入誤銷誤課自壞藩籬仰卽嚴諭各認商多備資本源源趕運仍俟年終考核一次

務令將應完課釐按數繳足不准絲毫蒂欠以免有名無實

同治五年正月江南鹽巡道龐際雲稟查大勝關督銷掣驗向歸一手經理而督銷保管上江等處八岸食鹽掣驗係管皖西楚三岸引鹽兩事原屬判然惟督銷以緝私爲根本而掣驗亦以緝私爲要務見雖分爲兩局而未便重複設卡致多虛糜查從前局設四卡一曰泗源溝卡專司儀徵句容食鹽掣驗抽釐等事而東陽分卡亦歸之一曰瓜埠卡專司六合食鹽掣驗抽釐及江浦食鹽抽釐等事而通江集分卡亦歸之此皆在大勝關

下游委員專辦以分督銷之事者也一曰大勝關上卡專爲驗收皖西楚三岸鹽船放行小票而設與督銷初不相涉而江甯縣屬之江甯鎮在大勝關以上居民轉販零星食鹽必以何公遠旗發票爲憑無該旗票卽係私鹽應由該卡員提解督銷局充公此該卡與督銷局相涉者也一曰草鞋峽下卡專爲緝私而設督銷莫要於緝私而草鞋峽又爲上江水路門戶上江高溧食鹽所必經之地而掣驗局亦倚之以爲重者職道前與陳令面商各卡事宜彼此互爲照料復奉憲臺面諭以泗源溝瓜埠兩卡歸督銷統轄上下兩卡歸掣驗統轄謹

卽遵照辦理惟上卡有驗何公遠旗票之責擬由該卡員將此事專報督銷局備查儻有私鹽歸督銷局照章辦理上江高溧食鹽以下關草鞋峽爲門戶擬由陳令代飭該卡委員認真巡緝並代飭掣驗局在事人等將上元江甯江浦高淳溧水五岸食鹽認真掣驗如有重斤夾私報督銷局查考其鹽卽就近存下關總卡統由陳令運赴大通變價按數核計分別照章辦理再大勝關先有掣驗後兼督銷在事人等儘可通融是以張前道於督銷後僅請添友一人書識二名募勇八名經爵閣督憲曾批准募勇四名餘照所請辦理在案查督銷

一事文案最繁而書寫釐票查驗催提護解釐金其事亦多切要職道擬不設局卽在署內兼辦以節經費擬添設書識二名親兵四名以資差遣所有巡船二隻已由陳令撥一隻歸督銷局仍遵憲臺面諭再添巡船一隻坐船一隻以便不時巡查張前道月領薪水百金職道係實缺人員不敢具領第督銷支用頗爲不貲且張前道於文案書識薪水外均給以飯食此時未便遽改前章職道撥此後所獲私鹽除二成備賞外餘俱絲毫歸公所有督銷用費應如何支銷乞批示遵行經鹽政李鴻章批據稟請添書識二名親兵四名及巡船坐船



各一號均准照辦每月准支督銷經費銀一百兩以爲  
新添書識人等及各友伙食等項之用其各卡薪工昨  
據陳令開摺具稟業已札飭金陵糧臺按月支給

同治五年四月鹽政李鴻章批皖鹽招商局稟宣城縣之  
水陽鎮旣據查明係屬皖引地界李恆和王同興何得  
在於該鎮對河開設兩店分銷高渚之鹽減價侵售仰  
卽飭委前往妥爲勒閉並候札飭督銷龐道諭飭該岸  
商凡與皖岸接壤邊境不准開店越售致滋弊混

同治五年五月皖鹽招商局道員魏承樾申查得和州與  
江浦接壤之烏江橋開有鹽店分銷江甯食鹽侵皖引

地界經署鹽政李鴻章批令一律閉歇嗣江甯食岸督銷局龐際雲詳該商見將烏江子店移進二十里之石磧橋地方開設

同治五年六月皖鹽招商局道員魏承樾申據東梁山稽查卡委員陳玉斌稟稱帶同礮船前赴甯國太平兩府屬與高溧交界地方逐處訪查沿途確探惟查得塘溝鎮立有當塗高溧兩縣界碑三塊界西爲塘溝鎮約鋪店六十餘家係當塗所屬界東爲長蘆鎮約鋪店四十餘家係高溧所屬兩鎮相離不過里許不意連界之長蘆鎮有黃福增開設義興鹽店分銷高溧引鹽每斤四

十文實係有意減價侵售繼到花津往小丹陽見中途  
石橋三道因大水漲泛坐小划船抵該處察看大小鋪  
店連絡百有餘家街中有北關口舊立界石碑一塊北  
關下係江甯界店鋪約四十餘家並開設金恆泰麗永  
隆鹽店兩家北關上係當塗所屬鋪店六十餘家市頗  
繁盛竟無代賣食鹽者推原其故因北關下恆泰永隆  
鹽店見在零售鹽價四十四文較之當塗官鹽價稍賤  
該鎮附近鋪店居民均往恆泰永隆鹽店購買是恆泰  
永隆有意侵銷皖引以致當塗官鹽不能暢銷繼回花  
津到護架墩出太平府金柱關赴采石離二十里之和

尙港進慈姑鎮逐細挨查該鎮有石橋一道店鋪五六  
十家係當塗所屬未見有代賣鹽店詢問民人此處食  
鹽從何處購賣據稱距橋里許之東有計賴邨係江甯  
府屬開有立泰鹽店我等附近鄉民皆赴立泰購買卑  
職卽往該處察看並無雜貨各店獨有朱福南開設立  
泰鹽店一家價賣四十四文又係有心侵銷皖地等情  
查各該分銷鹽店名雖設立本岸地界實則侵銷皖岸  
引路售之本岸發有行票售之皖岸無論躉買零發均  
無行票幾至查無可查此案應如何辦理之處理合備  
文申報經鹽政李鴻章批食岸科則較輕與皖境接壤

之處易致侵灌前經札飭龐道諭令不准設店在案茲據飭查高滄之長蘆鎮江甯之北關下計賴邨兩處與皖界毗連尙有黃義興等開設四店名雖設於本岸而實則暗侵皖引自應一律押閉以固皖岸藩籬

同治七年正月江南鹽巡道龐際雲詳查小丹陽地方前據該處紳耆以鹽店閉歇民食不便公舉張復生店計口授賣零鹽詳奉批准每月以二千一百斤爲度不准多銷嗣因查出浮銷卽經飭令於下月銷數扣回作抵在案茲竟溢銷至六萬斤之多自難姑縱亟應嚴行查辦以杜侵銷且計口授食名目雖正流弊滋多旋開旋

封尤屬不成事體因飭江甯縣遵照將張復生店封閉  
提案查訊溢銷數目詳請核辦經鹽政曾國藩批食岸  
邊界開設子店名爲計口授食其實無非爲侵銷皖界  
地步張復生意竟敢溢銷六萬餘斤之多實屬可惡自應  
將該店封閉以示懲儆嗣後各食岸無論何處凡近皖  
界三十里以內不准再設子店永杜越境侵灌之弊其  
皖岸邊境居民不能食淡應由皖局設法籌銷

謹按光緒九年復有附貢生易泰瑜稟請在橫溪橋  
開設子店橫溪又名橫水地近小丹陽鎮距皖岸交  
界之地僅二十里亦經鹽政左宗棠批駁不准

同治六年四月皖鹽招商局道員魏承樾申據東梁山查  
鹽委員稟稱前由大江巡抵新河口因有壩隄水路不  
通由旱路周查和州本城各鋪戶有行票水程可據惟  
聞離和州東門外七里之范橋十里之雙橋與江浦交  
界之地開有侵銷子店兩家因先至范橋察勘見有小  
港一道相距雙橋祇三里許港西係和州所屬港東係  
江浦地界該處別無雜貨等鋪祇有范基華敬經倫在  
港之東埂開設鹽店帶賣雜貨其鹽由江浦何公遠鹽  
旗分來每斤價錢四十四文和州附近居民皆往購買  
每日銷數約十包內外比至該店鹽已銷畢祇存一担

餘查出包四五百箇是其平日暢銷可知繼至雙橋察勘有邵玉堂又在港之東埂開設鹽店口稱裕昌卻並無招牌字樣鹽價如范橋皆四十四文而銷數更甚投店者皆和州人民子店門面與鹽行同可否移咨江甯督銷局飭將范橋雙橋侵銷子店押閉經鹽政曾國藩批食岸子店應設腹地良以食岸價賤皖岸釐重越銷一引食鹽卽短一引皖釐不能不權衡輕重力保藩籬各該岸商應亦曲體此意乃江浦岸商何公遠復在毘連和州之范橋雙橋分設兩店越境侵售殊屬不顧大局仰候札飭督銷龐道卽將該兩店勒閉具報一面通



諭各岸商嗣後開設子店須將離城若干里四至鄰縣  
邊界若干里逐細開明稟由該道詳候本部堂批准方  
准開設不得以店設本界藉口暗中取巧其雙橋店存  
鹽三十餘石姑念與販私有閒從寬免其充公諭令移  
回江浦總店售銷以示體恤

同治六年十一月江南鹽巡道兼辦江甯食岸督銷局龐  
際雲詳奉札據皖鹽招商局魏道申江浦岸商在於界  
連和州之范橋雙橋分設兩店侵銷皖岸請飭勒閉卽  
札飭江浦縣遵照嗣據岸商何公遠稟以雙橋地方坐  
落浦邑南路距石碇橋有四十餘里之遙浦城相去更

遠周圍三十里有唐宋馬化四圩承平時居民以萬計  
兵燹後僅存五百餘戶計口二千有奇每口需鹽三錢  
計每日共應銷鹽四十餘斤若不就近開設零鹽店該  
處貧民日食些須三文五文不等道阻且長淡食堪虞  
可否仿照小丹陽張復生零鹽店計口授食取具不敢  
越境侵銷切結俾居民得以就近買食於皖岸亦不致  
有礙銷路等情又據瓜埠卡員張令稟據江浦縣附生  
邵芬耆民朱錫南等稟以唐宋馬化豐樂黃墩六圩約  
有九百餘戶丁口約三千有零每日約需鹽百斤之數  
亦請在雙橋設店計口分售等情當經先後咨商皖岸

招商局嗣准魏道咨復以唐宋馬化四圩居民買鹽不  
便前定四十餘斤事屬便民惟該處唐宋馬化四圩而  
外有豐樂黃墩二圩地方較闊自應酌量加增所稱每  
日約需鹽百斤之數核與該縣前請四十餘斤多寡懸  
殊難保無藉端侵銷情弊咨覆核辦職道卽札飭江浦  
縣查明雙橋坐落化圩地方北至浦城九十餘里南至  
馬圩十餘里西至和州交界二三里東至江邊三里前  
稟雙橋零鹽店邵玉昌每日應銷四十餘斤係專指唐  
宋馬化四圩而言見查四圩之外又有豐樂黃墩兩圩  
毘連有三百餘戶計丁一千餘口連唐宋馬化四圩共

計丁口三千有零每丁食鹽三錢每日應加銷鹽二十餘斤共計每日應銷鹽六十餘斤職道伏查小丹陽地方因與皖岸接界奉飭將該處鹽店勒閉經紳耆等公舉居民張復生計口認數銷售詳奉陞任前爵署憲李批准在案茲江浦岸商稟在雙橋地方請設零鹽店計口售銷情事相同應否准其開設之處伏乞示遵經鹽政曾國藩批既據飭縣查明雙橋地方戶口請照張復生之案計口售銷每日限以六十斤爲度如詳准其開設仰仍按月稽核銷數毋任溢數侵售致礙皖引

謹按雙橋子店後溢數每日銷四五百斤侵占皖岸

復經鹽政曾國藩札飭閉歇

同治六年十二月瓜棧知府陳國熙詳據江甯食岸商人稟稱查食岸承運究與綱岸不同楚西綱鹽商販赴棧買鹽挨輪配運赴岸亦屬輪銷先後遲速聽人自爲本無窒礙況由各販分辦存岸鹽數甚多即使守輪挨運岸銷不虞缺乏而食岸係商等專認逐月定有引數必須隨時濟運方免誤銷向來某岸指買某垣之鹽原爲合銷起見如商何公遠認辦上江六浦四岸專運伍祐東何角斜場鹽商合太和所認高溧句三岸專運伍祐東何場鹽各岸居民食慣似較他場爲便但合銷之場

鹽到棧不無先後若俟到輪買運守候需時岸銷難免  
遲誤一經缺乏淡食堪虞責有攸歸其誰能貸商等再  
四思維惟有仿照江甘由場重運章程變通辦理擬請  
指買某場垣鹽卽於某場垣請運時註明售與某岸濟  
運一俟該場鹽到棧挂號商等仍遵章赴棧繕立交單  
完釐納課請運過掣隨到隨運俾免缺銷亦所以重課  
釐而保民食經鹽政曾國藩批上江高溧等七食岸係  
有專認之商與楚西皖按綱給票者微有不同據請指  
買場鹽到棧後仍照章訂交繳價掣運係爲便商起見  
准如所議辦理

同治七年七月岸商何公遠稟竊商由局轉奉憲批六合  
銷數疲滯連年銷不足額據稱該商賠墊難支係屬實  
情前本批令一年之後由該道妥酌稟辦今既未有起  
色自應酌量減引惟改爲每月百引所減未免太多應  
照該商上年原稟每月認銷一百三十引其江浦一岸  
銷數亦疲准其每月改認八十引以示體恤將來銷數  
漸暢仍應隨時詳請酌加至減引以後該商成本較輕  
誠如來詳未便再行增價致民間貪賤食私官銷益絀  
仰卽轉飭仍照前定價值出售等因仰見體恤商情無  
微不至惟民間貪賤食私積弊最爲難免況各岸釐課

懸殊勢不能不爭地界第分界徒競虛名而透私益滋  
弊實此則事關隔省或由淮南總局主張督銷局難於  
操縱用敢酌議數條叩求批示 一江浦初設旗店本  
在烏江嗣因皖局詳請奉憲批距皖三十里以內永不  
准再設子店並令皖局設法籌銷在案遵卽將烏江一  
店移至石磧橋開設竊思食岸分地本狹以皖省之大  
乃與僻縣爭尺寸之地猶謂楚弓楚得總因課則較重  
力求疏銷固本起見並非割棄引地開私販侵占之路  
也乃自雙橋邵裕昌零店勒閉被押該處人民誤會意  
指以爲領鹽卽爲犯法又不願食隔省貴鹽一年以來



烏江暨雙橋等處更不向旗店領鹽乃聞和州鹽行銷數亦益形短縮良由私販乘虛闖入挨門送賣既賤且便皖局既不及稽查商店更不便巡緝如浦岸兩店向來每月約銷七十引今祇得二十餘引卽和州鹽行亦祇有合泰一家每日銷鹽不足一包足見官店撤退非惟有損於食岸亦且有損於皖岸今則私販肆行直無忌憚若再隱忍不言岸務將不可問商擬請由縣傳諭該處地保每旬醵錢赴旗店領鹽分給食戶如查有越境發售卽予嚴行懲辦更不准再食私鹽庶兩境銷數不至爲私梟占盡矣 又江浦石磧橋一店並城中一

店僅占浦邑東北一隅此外距皖之地徑直三十里迤  
長一百餘里並無一店前年稟明汭河爲進私總匯請  
於該處設店以便嚴緝廣銷奉諭俟皖局查覆有無關  
礙方准開設商聞皖局業經委員踏勘該處由和州起  
駁水陸重阻斷非水販所能到故至今尙無查覆竊查  
汭河乃舊商設店之地雖與皖境相連但旣無皖販又  
無皖行卽不在三十里之限近來南私北私皆此路透  
入不獨浦六受害並皖境亦被侵灌以官商引地棄與  
私梟實爲可惜相應仰懇憲恩准於汭河設立緝私分  
店俟全椒滁來等處認岸有人再行查照定章各清界

限一六合以東溝爲總口設有商店乃儀徵汪恆泰  
卽於對岸設店鹽價每斤二十六文商亦跌價至二十  
八文勢仍不敵至天長之汭澗與六合毘連向無鹽店  
自儲鼎豐認岸後卽於該處設店每斤祇賣二十四文  
日銷三四十包至七八寸包不等商岸程橋水灣兩店  
遂同虛設應懇憲恩飭將汪恆泰儲鼎豐兩處分店移  
退三十里以符新章商卽將水灣一店移至竹鎮就濟  
民食一各岸引鹽歲有定額每逢閏年並不增引惟  
商於上江認岸時奉到憲批以四年五月爲始直至閏  
五月始行設店當時照已售之引按引交釐尙未定按

季包釐之議因此逐月呈繳統歸年終核計今既按季包釐本年適逢閏月應請援照舊例並各岸定章懇恩免繳閏月釐金庶歲額不至參差商力亦得稍紓矣經鹽政曾國藩批據稟整頓岸務章程四條第二條江浦之汊河擬設分店上年曾據龐道具詳當以該處離滁來甚近批令俟滁來兩岸江運議定後再行飭遵在案見在江運業已開辦滁來因認岸無人暫從緩議不致有占皖界之慮應如所請暫由該商在於汊河設店分銷仍俟滁來得有認商再行查照定章辦理第三條天長汊澗既與六合毘連天長科則較輕該岸商自不應

在於該處設店致占六合官引候飭淮運司諭令儲鼎  
豐即將該店移退三十里以清引界至儀徵與六合科  
則相同儀邑岸商見因銷疲方求退岸此店應如何酌  
量改移之處候札龐道查詳察辦第四條上江兩岸見  
在按季包釐逢閏既不增引准其免增閏月釐金以昭  
公道惟第一條江浦之烏江雙橋兩處均與皖界接壤  
迭次批明不准設店以保皖岸藩籬該處果有私販充  
斥該商儘可隨時稟緝若假手於地保赴鹽旗領鹽按  
戶派賣若輩以需索爲慣技久之必致出錢之戶賣放  
而任其食私窮苦之民辭鹽而勒令出費終年受地保

之累流弊不可勝言礙難准行

同治七年九月江南鹽巡道兼江甯食岸督銷局龐際雲  
申職道自同治五年正月接辦督銷局務一切支銷有  
由下關局移交者有奉前署督憲李批准者有奉憲臺  
批准者其由下關局中移交者文案一人每月銀二十  
兩親兵四名每名每月三兩六錢書識二名每名每月  
八兩又撥來巡船一號每月十兩八錢奉前署督憲  
李批准者督銷經費銀每月一百兩又坐船一隻每月  
銀二十二兩巡船一隻每月銀十兩八錢親兵四名每  
名每月銀三兩六錢共計本局月需銀二百八兩四錢

本年六月復詳奉憲臺批准添派吳委員入局每月薪水銀二十兩共計月需銀二百二十八兩四錢以上各款皆由本局支銷至鹽卡兩處支銷亦係由下關局移交如泗源溝鹽卡兼下蜀街分卡卽前東陽卡委員薪水銀每月二十兩巡船一隻每月銀十兩八錢書識三名六兩者二名八兩者一名每月二十兩巡勇十二名每名每月三兩六錢卡房租銀每月一兩又房租錢每月六千文計泗源溝卡每月共需銀九十五兩錢六千文再瓜埠鹽卡兼通江集分卡委員薪水銀每月二十兩巡船一隻每月銀十兩八錢書識二名每名每月銀

六兩巡勇十二名每名每月三兩六錢通江集卡房地  
租銀每月一兩瓜埠卡房每月地租銀一兩同治五年  
十月起支瓜埠卡每月共需銀八十八兩以上本局及  
兩卡通計每月需銀四百十一兩四錢錢六千文兩年  
以來由北征糧臺按月支領轉放

同治七年十二月鹽政馬新貽批瓜棧詳甯屬七食岸及  
儀徵一岸有商專認上年整輪時既准指買場鹽自爲  
一輪此次准仍循案辦理於重照內註明食岸字樣如  
遇銷暢時偶買棧中之鹽仍應於各岸一律歸輪必須  
買到輪和鹽方准訂交過掣不准擅買未到輪之鹽以



杜搶跌

同治八年四月運司方濬頤詳查汧澗地方原係天長適中之地水陸交衝走私要隘是以設店堵私以保引額惟距六合邊界二十五里與皖局新章三十里內不准設店之案未符自應飭商移退至奉議加釐金與六合售價不甚懸殊一節飭據該員等查明湖西私鹽每斤十二文天長售價每斤二十二文雖較六合岸價稍輕仍虞難以敵私該岸欲冀疏銷首重減價若令遽行加釐勢必提價一經提價卽與私鹽價值更相懸殊小民趨利若鶩必致貪賤食私誠恐難銷足額正課必有所

虧且見奉加定引數尤須輕本利運減價疏銷方可引  
清課裕本司察核情形應請仍循其舊免再加釐飭令  
將汭澗分店暫行移退石梁以清引界仍容察看天長  
六合岸銷再行酌量辦理並責成籌銷委員等在於汭  
澗別業店鋪內慎擇誠實可靠之人取具認保各結准  
令擺設盆匾祇許零銷不准躉賣庶於接濟民食之中  
仍寓嚴定限制之意經鹽政馬新貽批汭澗分店既經  
飭據議覆移退石梁所請在於該鎮別業店鋪售賣零  
鹽以便民食均准照辦如有侵銷鄰岸情弊察出定惟  
該員等是問目前鹽店既已移退姑准暫免加釐將來

銷數如前暢旺仍當詳議酌加以杜影射

同治八年十二月金陵軍需局道員洪汝奎江甯督銷局道員凌煥等詳奉札開查江甯食岸係岸商認引完釐與楚西皖各岸情形不同似未能於完納正釐之外另收局用下關掣驗局則更無費用可收嗣後兩局薪糧勢不能不仍由軍需局支給以資辦公等因本司卑府等查軍需局向來所收閒款無多而放款下應刪歸外銷之款實屬不少七年以前支放江甯督銷掣驗兩局薪糧有掣驗局功鹽變價一款抵支尙且不敷甚鉅本年功鹽變價已奉提充善後工程等用而兩局薪糧見

仍由軍需局支給將來報銷局礙難造銷本司等已慮及之今奉前因自應分別籌議查本年秋冬兩季江甯督銷局共支薪糧等銀二千三百五十兩一分五釐一毫八絲八忽五微掣驗局共支薪糧等銀四千七百八十八兩一分六釐六毫四絲八忽四微合共支湘平銀七千一百三十八兩三分一釐八毫三絲六忽九微連春夏兩季兩局共支銀六千七百七十七兩八錢一分五釐六毫七絲八忽八微計自八年正月起至十二月止督銷掣驗兩局共支湘平銀一萬二千九百十五兩八錢四分七釐五毫一絲五忽七微此本年已支之數

本司等通盤籌算實無他款可以彌補惟查前奉憲臺札提甯屬繕造輿圖經費指撥湖南督銷局找解截至六年九月底止湘鹽官運餘利湘平銀三萬二千六百二十兩九錢四分內坐撥輿圖經費庫平銀二萬兩申合湘平二萬七百二十六兩除撥過庫平銀一萬兩仍存庫平銀一萬應候撥解外下餘湘平銀一萬一千八百九十四兩九錢四分擬請儘數彌補本年督銷掣驗兩局已支之款其九年正月起督銷掣驗兩局應支之款既未能另收局用亦實無他項閒款可撥擬請仍以下關掣驗局功鹽變價一款改解軍需局抵支兩局薪

糧惟功鹽變價多寡本無定數若僅以此一款備抵兩局支款誠恐仍屬不敷七年以前有明證也並請飭提皖鹽報效一款同下關掣驗局功鹽變價一款自九年正月起一併仍解軍需局濟用除放江甯督銷掣驗兩局費用如有盈餘藉可彌補八年以前不敷之數斯江甯督銷掣驗兩局費用有著而以閒款抵放閒款庶將來報銷亦不致掣肘經鹽政馬新貽批江甯督銷掣驗兩局費用據該道等會議請仍以掣驗卡功鹽變價一款改解軍需局抵支兩局薪糧應准照辦如有不敷亦准在於皖岸報效項下撥補但報效一項未便全解軍

需局仰俟每年六月十二月兩次截數將實在不敷數目隨時稟候札飭江藩司撥還歸款

同治十年九月署鹽巡道孫衣言等申查辦江甯省城醬園認缸一案見據各醬園及雜貨店分別具結遵認並經札飭江甯府督同縣委各員妥議簡明章程於疏銷之中仍寓便民之意刊入縣照給發遵守茲據呈擬章程及縣照式樣前來除經司道等酌定札發江甯府轉飭上江二縣刊刻給發各鋪戶收執永遠遵守並飭將發過各戶花名缸數造具清冊另行通送查考

附刊入照內章程

一醬坊缸隻按照大中小三則派令認銷官鹽每年大缸每隻二百斤中缸每隻一百二十斤小缸每隻八十斤醃缸每隻九十斤各醬坊永遠遵章辦理由岸商於年終彙核銷數缺溢呈縣申報鹽院司道查考日後生意貲本或有暢滯長落則缸數自有增減准其隨時報明岸商由岸商驗實稟縣辦理以杜弊混

一醬坊例不准擺設盆鹽見在城鄉大小醬坊均已出具切結不得另設盆匾希圖影射販私如敢陽奉陰違查出拏究不貸

一各醬坊自此次認定缸數後如有續行稟開者照章



取具各結由岸商加結請給執照並須立有鋪面方准開設不得在家私造違者拏究

一城鄉雜貨鋪戶帶售零鹽零醬見經出具遵銷官鹽官醬切結均須取有岸商官醬園發票以憑查考不得私造私販並責成岸商官醬園隨時覺察違者稟明究辦

一雜貨行國賣私鹽私醬尤宜嚴禁見在定章各醬園既認定缸隻雜貨店又帶售零鹽均係遵銷官引如有雜貨官行私售鹽醬准各官醬園鹽店報明岸商稟請拏究

一清釐醬缸每年夏季運司衙門本有例差其各衙門差票挨查有查弊之名無查弊之實徒滋需索嗣後毋庸差查以示體恤

光緒元年十一月上江浦六岸商何公遠稟請退岸所有光緒元年十二月二十九日以前認銷包釐仍由商自行呈繳清理二年正月初一日以後卽責成新商劉泰益認銷包釐經鹽政沈葆楨批查該商認運上江浦六四食岸欠完九十兩年包釐及十二三兩年溢銷鹽釐共計六千五百餘兩之多旣願退岸不能絲毫蒂欠候札食岸督銷局勒令剋日繳清具覆至本年冬季包

釐俟年終截數有無溢銷卽飭另行解繳並札淮運司查明該商課項是否清完一面查明新商乙和祥如果結實可靠再取的名認結具詳察辦

光緒二年三月儀徵岸商順興稟請退岸以新商敦泰厚接辦經鹽政沈葆楨批查該商順興有欠完同治十年十一年包釐及溢銷銀兩疊飭限繳未據報完此等釐銀認商一味拖延已失包岸之義見據稟請退岸若不如數追清此後該商更得逍遙事外鹽釐係報部正項豈容任其欠抗仰候札飭督銷局陶道從嚴勒追具覆毋稍瞻徇其釐未繳清以前不准新商先行接充

光緒二年六月退商何公遠稟前蒙督鹽憲批該商認運  
上江浦六四岸欠完九十兩年包釐及二十三年  
溢銷鹽釐共計六千五百餘兩之多既願退岸不能絲  
毫蒂欠等因奉此商遵卽將六千五百餘兩鹽釐埽數  
清完元年十二月二十九日止岸鹽銷數截清呈報交  
劉泰益接手以專責成並呈繳生息公款奉發交新商  
劉泰益生息在案今於二年正月間奉憲臺諭以商額  
銷引數內尙欠繳六千六百八十七引出江釐金及錢  
糧課項飭商按引完繳毋延等因伏思此項欠額係以  
歷年認銷引數統計缺運之數惟呈繳釐課有場岸之

分且有行商坐賈之別而包繳與否亦有一定章程岸商認岸包釐乃坐賈之釐金也商認岸時當奉督銷局詳准分作三箇月一限商依限呈繳八年二月又奉督銷局詳奉前督鹽憲馬批缺則包釐溢則照加以本年爲始從前毋庸補繳各食岸一律照辦在案至出江釐乃行商之釐金也出一引江卽繳一引釐商遵例隨運隨繳錢糧課項向係場商所繳十年正月因牌價以錢合銀較原定時數甚懸殊稟蒙運憲詳奉前督鹽憲批准在於牌價內每包畫減錢一百五十八文由運商改銀繳納商亦遵章隨運隨繳自同治四年認岸之日起

至光緒元年退岸之日止已運之鹽均已繳過出江釐金及錢糧課項並無絲毫帶欠從未奉詳准諭飭包繳有案卽前商吳榮泰稟退六合汪恆泰興和泰稟退儀徵及見辦高溧句商人合太和亦均未有包繳明文商事同一律並非敢於違延且包繳岸釐之案以八年爲定查四年起至七年止上江浦六四岸共缺銷四千三百六十八引七包以上缺銷之鹽卽是缺運之數係在同治八年定案以前自應援照岸釐毋庸補繳外尙缺銷鹽二千三百十九引商見已退岸萬難措此巨款惟旣奉飭繳因思正課絲毫爲重又何敢不竭力遵籌再

四設措擬將二千三百十九引錢糧正課銀二千八十  
七兩一錢勉力籌繳以副大憲裕課之至意至出江釐  
金本係較輕於課業經出江者已按引呈繳見在飭繳  
者又係未經行運之引似與已運未繳者固有區別卽  
與岸釐應包者亦不相同伏乞垂念從前並無包繳之  
案目前商因無力承運業已退岸俯賜據情詳請免其  
追繳嗣經運司方濬頤詳何公遠承辦上江浦六食岸  
本有包完課釐之責不容稍有短少致引額幾同虛設  
惟同治八年以後欠運正課及出江釐金業據總局稟  
明由本商及新商全數繳清所有八年以前請援照批

定岸釐成案准其免繳經鹽政沈葆楨批准

光緒三年七月鹽政沈葆楨批運司歐陽正埔稟認岸本  
應暢滯配勻今順興以泰興暢岸攘爲己有而以儀徵  
滯岸另招新商已屬狡獪迨經飭追從前欠釐該商竟  
置若罔聞仍將岸務私相授受以致多所周折實爲鹽  
務之蠹該司查明與尋常乏商不同不難著落清繳仰  
卽由司勒限嚴追務令順興將新舊欠釐一併繳清始  
准新商福祥裕接辦儻再抗延卽將泰興暢岸一併扣  
運詳候參辦並候札飭督銷劉道一體嚴追以重公項  
光緒八年十月鹽政左宗棠批儀徵食岸商人福祥裕稟



此案前據該商具稟經劉前部堂批儀徵本屬滯岸向歸暢岸配認該商係兼辦江甘獲利較厚即使儀徵小有虧折亦可以有餘而補不足等語極爲明晰卽如江浦六合亦屬滯岸必責成上江商人配認同一用意若准該商卸此仔肩則浦六勢必援請以後暢岸有商專認滯岸盡屬虛懸如

一國課何至科則改照江甘售價一賤該岸濱臨大江勢必影射出江江甯食岸先受侵灌皖岸亦難免受累且查儀徵本年上半銷鹽四百六十六引比較七年上半祇銷鹽三百七十八引有盈無絀所請未便准行

光緒十年四月句容武舉聞人東亮稟前因合太和鹽棧開於城中並無分鋪希冀把持取巧扣稱等情曾於本年正月間稟請縣憲當蒙批示查明照舊分銷以便民食等因詎料該合太和鹽棧至今並未遵行伏思向年舊章本城鹽棧向設五門盆銷以濟民便見在東西兩鄉私販甚夥雖有鹽勇未能稽查是徒有虛名並無實濟乞賞准飭行督銷局轉飭遵辦並由局行句容縣示遵分銷以便民食而杜私販經鹽政曾國荃批棧設城中四鄉鋪民自能赴棧躉買零售合太和果有取巧扣稱情弊何以闔邑紳民並無異言獨該武舉一人出頭

呈控顯係意存訛索不准嗣於七月覆稟又經鹽政曾國荃批官棧無盆銷之案句邑五門外鄉鎮如果缺鹽鋪戶必能赴棧躉買零售何致不便民食毋得再瀆

光緒十三年七月鹽政曾國荃批署運司程桓生稟六儀互控馬坊營盆匾一案經該司派委會勘查明儀境運道戶口公議馬坊營盆匾通年運鹽四百包由沿江緝私局給照六岸匯濟橋卡勇照常駐劄巡緝所議尙屬允洽准其如稟立案仰候札飭沿江緝私楊道就近稽查以後儀商固不得溢額侵銷六商亦不得任勇滋事各守疆界各保藩籬以杜紛爭而敦鄰好並候札飭江

甯督銷局一體飭遵

兩淮鹽法志卷八十一